




4

Broj: 02-04-2-116/2022  
Goražde, 10.01.2022. godine



## GRADSKO VIJEĆE GRADA GORAŽDA

N/r. Bajro Obuća- predsjedavajući

### Predmet: Zahtjev za održavanje sjednice Gradskog vijeća, dostavlja se.-

U skladu sa članom 71. stav (2) Poslovnika o radu Gradskog vijeća Grada Goražda **podnosim zahtjev** za održavanje sjednice Gradskog vijeća.

Razlog za podnošenje ovog zahtjeva sadržan je u činjenici da je Rješenjem Kanatonalnog upravnog inspektora, broj UP-1-05-04-146/21 od 18.11.2021. godine, naloženo Gradonačelniku Grada Goražde da preduzme radnje za usklađivanje Odluke o utvrđivanju platnih razreda i koeficijenata državnih službenika i namještenika Općine Goražde ("Službene novine BPK Goražde" broj: 14/06) sa Zakonom o plaćama i naknadama u organima vlasti Federacije Bosne i Hercegovine ("Službene novine Federacije BiH" broj: 45/10 i 111/12 i 20/17). Također, istim Rješenjem naloženo je usklađivanje Pravilnika o plaćama i drugim naknadama državnih službenika i namještenika u Službama gradske uprave Goražda ("Službene novine Grada Goražde" broj: 6/20) sa navedenim Zakonom. Navedena usklađivanja potrebno je uraditi u roku od 60 dana od dana izvršnosti Rješenja. Poslije isteka roka od 60 dana od dana izvršnosti navedenog Rješenja neću moći postupati po „postojećoj“ Odluci o otvrđivanju koeficijenata državnih službenika i namještenika i Pravilniku o plaćama i drugim naknadama državnih službenika i namještenika u Službama gradske uprave Grada Goražda jer postupanjem po istim počinio bi krivično djelo.

Kao Gradonačelnik sam u skladu s pozitivnim pravnim propisima pripremio prijedlog Odluke koje sam uputio na razmatranje i usvajanje Gradskom vijeću, a po Rješenju upravnog inspektora. Iz svega gore navedenog se može zaključiti bitnost i hitnost održavanja sjednice Gradskog vijeća i razmatranja predložene Odluke.

S poštovanjem,

### DOSTAVLJENO:

1. Naslovu
2. U dosije
3. Arhivi



GRDONAČELNIK

ERNEST IMAMOVIĆ

## PRIJEDLOG

Na osnovu članova 9., 20., 21, i 60. stav 1. Zakona o plaćama i naknadama u organima vlasti Federacije Bosne i Hercegovine ("Službene novine Federacije BiH" broj 45/10 i 111/12 i 20/17) i na osnovu člana 17. i 88. Statuta Grada Goražda ("Službene novine Grada Goražda" broj: 05/18), Gradsko vijeće Grada Goražda na svojoj..... redovnoj sjednici održanoj dana \_\_\_\_\_2022. godine donijelo je

### ODLUKU

**o utvrđivanju platnih razreda i koeficijenata za plaće, dodataka na plaće i naknada plaće izabranih dužnosnika, nosilaca izvršnih funkcija i savjetnika, državnih službenika i namještenika Grada Goražda**

#### I - OPĆE ODEREDBE

##### **Član 1. (Predmet)**

- (1) Ovom Odlukom utvrđuju se platni razredi i koeficijenati za plaće, dodatci na plaću i naknada plaće izabranih dužnosnika, nosilaca izvršnih funkcija i savjetnika, državnih službenika i namještenika Grada Goražda (u daljem tekstu: zaposlenici).
- (2) Zaposlenicima gradskih organa Grada Goražda smatraju se izabrana i imenovana lica, kao i državni službenici i namještenici, koji su u radnom odnosu u gradskim službama i Gradskom pravobranilaštvu.
- (3) Izabranim licima smatra se Gradonačelnik kao nosilac izvršne funkcije, predsjedavajući i zamjenici predsjedavajućeg Gradskog vijeća.
- (4) Imenovanim licima smatraju se Gradski pravobranilac, Sekretar gradskog vijeća Grada Goražde i savjetnici Gradonačelnika.
- (5) Državnim službenicima smatraju se uposlenici koji obavljaju poslove osnovne djelatnosti iz nadležnosti gradskog organa državne službe.
- (6) Namještenicima se smatraju uposlenici koji obavljaju dopunske poslove osnovne djelatnosti i poslove pomoćne djelatnosti iz nadležnosti gradskog organa državne službe.

**Član 2.**  
**(Načela za utvrđivanje visine plaće)**

Pri određivanju iznosa plaća i naknada za zaposlenike na koje se ova Odluka odnosi poštivat će se sljedeća načela:

1. Ista plaća za isto radno mjesto: prema ovom načelu zaposleni koji obavljaju poslove istog radnog mjesta odnosno iste ili slične poslove, imaju pravo na istu osnovnu plaću po vrsti i stepenu stručne spreme;
2. Transparentnost: prilikom raspisivanja javnih konkursa i oglasa za popunjavanje radnih mjesta, obavezno se objavljuje podatak o pripadajućoj osnovnoj plaći za oglašena radna mjesta.
3. Fiskalna odgovornost: utvrđivanje i isplata bruto plaća i naknada korisnicima prava na osnovu utvrđene osnovice može se vršiti samo da visine planiranih sredstava u budžetu za te namjene.

**Član 3.**  
**(Budžetsko osiguravanje sredstava za plaće i naknade)**

Financijska sredstva za plaće i naknade i druga primanja zaposlenika propisana ovom Odlukom planiraju se i obezbjeđuju se u Budžetu Grada Goražda (u daljem tekstu Budžet).

**Član 4.**  
**(Način utvrđivanja osnovice za obračun plaće)**

- (1) Osnovica i bod za obračun plaće utvrđuju se Odlukom o izvršavanju Budžeta za svaku budžetsku godinu ili odlukom o privremenom finansiranju i primjenjuje se od 01.01. za svaku narednu godinu.
- (2) Utvrđivanje osnovice i boda vrši se u pregovorima sa reprezentativnim sindikatom, a prije usvajanja odluka iz stava (1) ovog člana.
- (3) Ukoliko Gradonačelnik i sindikat ne dogovore visinu osnovice i boda, Gradsko vijeće će utvrditi osnovicu i bod, pri čemu visina osnovice ne može biti niža od prethodno dogovorene, odnosno važeće.
- (4) Prilikom utvrđivanja osnovice i boda iz stava (1) i (2) ovog člana uzet će se u obzir projekcije budžeta za narednu godinu, kao i kretanje GDP i indeksa potrošačkih cijena, a prema podacima Federalnog zavoda za statistiku.
- (5) Isplate mjesečnih novčanih primanja, izvršene u skladu sa odredbama ove odluke su definitivne i konačne.

**Član 5.**  
**(Elementi za uvrđivanje osnovne plaće)**

- (1) Osnovna plaća utvrđuje se množenjem osnovice za plaću iz člana 4. ove Odluke i boda za obračun plaće sa utvrđenim koeficijentom platnog razreda i tako utvrđeni iznos uvećava se za 0,6% za svaku započetu godinu penzijskog staža izabranih i imenovanih lica, državnih službenika i namještenika, a najviše do 20%.
- (2) Osnovna plaća ne može biti manja od 70% prosječne neto plaće isplaćene u Federaciji BiH prema posljednjem objavljenom statističkom podatku.
- (3) U slučaju da množenjem utvrđene osnovice i boda za obračun plaće i pripadajućeg koeficijenta platnog razreda, osnovna plaća iznosi manje od 70% prosječne neto plaće isplaćene u Federaciji BiH prema posljednjem objavljenom statističkom podatku, zaposleniku će se isplatiti plaća u navedenom postotku.
- (4) Osnovna plaća obračunava se i iskazuje mjesečno za puno radno vrijeme, prema radnom mjestu i odgovarajućem platnom razredu.
- (5) Ukoliko zaposlenik radi sa nepunim radnim vremenom, u skladu sa posebnim zakonom ili drugim propisima, osnovna plaća odredit će se srazmjerno vremenu provedenom na radu.
- (6) Puno radno vrijeme zaposlenih je 40 sati sedmično.

**II – PLAĆE IZABRANIH I IMENOVANIH LICA**

**Član 6.**  
**(Ostvarivanje plaće prema radnom mjestu)**

- (1) Gradonačelnik, predsjedavajući i zamjenici predsjedavajućeg Gradskog vijeća (ako funkciju obavljaju profesionalno), savjetnici Gradonačelnika, Gradski pravobranilac i sekretar Gradskog vijeća imaju pravo na plaću koja odgovara njihovoj poziciji, odnosno radnom mjestu.
- (2) Osnovna plaća zaposlenih iz stava (1) ovog člana utvrđuje se prema članu 5. ove Odluke.

**Član 7.**  
**(Vrijeme ostvarivanja prava na plaću)**

Gradonačelnik, predsjedavajući i zamjenici predsjedavajućeg Gradskog vijeća (ako funkciju obavljaju profesionalno), savjetnici Gradonačelnika, Gradski pravobranilac i sekretar Gradskog vijeća, pravo na plaću ostvaruje danom stupanja na dužnost, u skladu sa propisima o izboru i imenovanju, odnosno postavljenju.

**Član 8.**  
**(Platni razredi i koeficijenti)**

(1) Izabrana i imenovana lica razvrstavaju se u 5 (pet) platnih razreda i za svaki platni razred se utvrđuju koeficijenti za obračun plaća u slijedećim vrijednostima:

Platni razred	Pozicija radnog mjesta	Koeficijent
I	- Gradonačelnik	8,55
II	- Predsjedavajući Gradskog vijeća	7,55
III	- Zamjenik predsjedavajućeg Gradskog vijeća	7,00
IV	- Gradski pravobranilac - Sekretar Gradskog vijeća	6,55 6,50
V	- Savjetnik Gradonačelnika	5,7

(2) Osnovna plaća zaposlenika iz stava (1) ovog člana utvrđuje se prema članu 5. ove odluke.

**Član 9.**  
**(Način obračuna i isplate plaće)**

(1) Plaća zaposlenih obračunava se za jedan mjesec unatrag, a isplaćuje se za prethodni mjesec u skladu sa Zakonom o radu i Odlukom o izvršavanju Budžeta Grada Goražda.

(2) Podaci o plaćama izabranih i imenovanih lica su javni.

**III – PLAĆE DRŽAVNIH SLUŽBENIKA I NAMJEŠTENIKA**

**Član 10.**  
**(Određivanje plaće prema radnom mjestu)**

Državni službenici i namještenici zaposleni u gradskim službama i gradskom pravobranilaštvu (u daljem tekstu: državni službenici i namještenici) imaju pravo na plaću koja odgovara radnom mjestu na koje su državni službenici odnosno namještenici postavljeni.

**Član 11.**  
**(Platni razredi i koeficijenti za državne službenike)**

(1) Radna mjesta državnih službenika razvrstavaju se u 8 (osam) platnih razreda i za svaki platni razred se utvrđuju koeficijenti za obračun plaća u slijedećim vrijednostima:

<b>Platni razred</b>	<b>Pozicija radnog mjesta</b>	<b>Koeficijent</b>
I	- Sekretar organa državne službe	6,20
II	- Pomoćnik rukovodioca organa državne službe	5,70
III	- Interni revizor - Glavni inspektor	5,20 5,20
IV	- Šef unutrašnje organizacione jedinice (VSS)	4,50
V	- Inspektor	4,30
VI	- Stručni savjetnik	4,10
VII	- Viši stručni saradnik	3,90
VIII	- Stručni saradnik	3,70

(2) Osnovna plaća uposlenika iz stava (1) ovog člana utvrđuje se prema članu 5. ove Odluke.

**Član 12.**  
**(Platni razredi i koeficijenti za namještenika)**

(1) Radna mjesta namještenika razvrstavaju se u 7 (sedam) platnih razreda i za svaki platni razred se utvrđuju koeficijenti za obračun plaća u slijedećim vrijednostima:

<b>Platni razred</b>	<b>Pozicija radnog mjesta</b>	<b>Koeficijent</b>
I	- Šef unutrašnje organizacione jedinice (VŠS)	3,20
II	- Viši samostalni referent (VŠS)	3,10
III	- Samostalni referent (VŠS)	3,00
IV	- Šef unutrašnje organizacione jedinice (SSS)	2,80

V	- Viši referent (SSS)	2,70
	- VKV radnik	2,70
VI	- Referent (SSS)	2,60
	- KV radnik III i IV stepena	2,60
VII	- Pomoćni radnik	1,85
	- Nekvalificirani radnik	1,85

(2) Osnovna plaća zaposlenika iz stava (1) ovog člana utvrđuje se prema članu 5. ove Odluke.

**Član 13.**  
**(Način obračuna i isplate plaće)**

- (1) Plaća se obračunava za jedan mjesec unatrag, a isplaćuje se za prethodni mjesec u skladu sa Zakonom o radu i Odlukom o izvršavanju Budžeta Grada Goražde.
- (2) Plaća iz stava (1) ovog člana utvrđuje se rješenjem koje donosi Gradonačelnik, a sadrži: lične podatke državnog službenika i namještenika, radno mjesto na koje je postavljen, platni razred i sve elemente koji su uzeti u obzir za utvrđivanje visine plaće.
- (3) Podaci o plaćama državnih službenika i namještenika su javni.
- (4) Sve izmjene u visini plaće vršice se rješenjem koje donosi Gradonačelnik.

**IV – UVEĆANJA OSNOVNE PLAĆU**

**Član 14.**  
**(Uvećanja osnovne plaće)**

- (1) U slučaju prekovremenog rada, rada u neradne dane (subotom i nedjeljom), noćnog rada ili rada u dane državnih praznika, zaposlenik ima pravo na uvećanje osnovne plaće, srazmjerno vremenu trajanja tog rada, uvećanog za postotak utvrđen kolektivnim ugovorom. Pravo na uvećanje osnovne plaće u slučaju rada u neradne dane (subotom i nedjeljom) nema uposlenik na radnom mjestu koje se organizovano obavlja u smjenama.
- (2) Visinu naknade i uvjeti za ostvarenje naknade utvrdit će se pravilnikom o plaćama i naknadama.
- (3) Obračun naknade iz stava (1) ovog člana vrši se od osnovne plaće bez dijela plaće po osnovu penzijskog staža. Naknada iz ovog člana čini sastavni dio plaće.

**Član 15.**  
**(Uvećanje plaće po osnovu posebnih uslova rada)**

- (1) Uvećanje plaće po osnovu posebnih uslova rada iznosi, i to:
- a) Za inspektora i glavnog inspektora, u visini od 20% do 30% od osnovne plaće,
  - b) Zbog posebnih uslova rada, težine i prirode posla i odgovornosti za obavljanje poslova vatrogastva iz člana 68. Zakona o zaštiti od požara i vatrogastvu, za starješine profesionalne vatrogasne jedinice, zamjenika starješine profesionalne vatrogasne jedinice i vatrogasce u profesionalnoj vatrogasnoj jedinici Grada Goražda do 30% od osnovne plaće, a ostali službenici i namještenici na poslovima u profesionalnoj vatrogasnoj jedinici Grada Goražde do 20% od osnovne plaće;
  - c) Za ostale poslove koji se vrše pod posebnim uslovima rada određenim posebnim zakonom, dodatak na plaću se određuje u skladu sa tim zakonom.
- (2) Uvećanje plaće iz stava (1) ovog člana obračunava se na osnovnu plaću bez dijela plaće po osnovu radnog staža i čini sastavni dio plaće.
- (3) Uvećanje osnovne plaće po osnovu posebnih uslova rada iz stava (1) ovog člana utvrđuju se u pravilniku o plaćama i naknadama gradskih organa Grada Goražde, u skladu sa kriterijima utvrđenim kolektivnim ugovorom, zakonom i drugim propisima.

**IV – NAKNADE PLAĆE**

**Član 16.**  
**(Vrste naknada)**

Zaposlenik ima pravo na naknade utvrđene odredbama članova 17. do 28. ove odluke.

**Član 17.**  
**(Naknada za ishranu tokom rada)**

- (1) Zaposlenik ima pravo na novčanu naknadu za ishranu u toku rada (topli obrok) u visini od 1% prosječne neto plaće isplaćene u Federaciji Bosne i Hercegovine prema posljednjem objavljenom statističkom podatku Federalnog zavoda za statistiku.
- (2) Naknada iz stava (1) ovog člana neće se obračunavati za vrijeme odsutnosti sa posla po osnovu službenog puta, bolovanja, godišnjeg odmora, plaćenog ili neplaćenog odsustva.



**Član 18.**  
**(Regres za godišnji odmor)**

- (1) Zaposlenik ima pravo na naknadu na ime regresa za korištenje godišnjeg odmora u visini od 50% prosječne neto plaće isplaćene u Federaciji Bosne i Hercegovine, prema posljednjem objavljenom statističkom podatku Federalnog zavoda za statistiku.
- (2) Pravo na regres iz stava (1) ovog člana ima svaki uposlenik koji u toku tekuće kalendarske godine ima pravo na godišnji odmor.

**Član 19.**  
**(Naknada za bolovanje)**

- (1) Zaposlenik ima pravo na naknadu plaće za vrijeme privremene spriječenosti za rad (bolovanje) do 42 kalendarska dana u visini njegove neto plaće isplaćene za prethodni mjesec.
- (2) Naknada plaće za bolovanje preko 42 dana iz stava (1) ovog člana ostvaruje se po propisu Kantona kojim se uređuje naknada za ovo bolovanje, s tim da razliku do pune plaće isplaćuje Grad Goražde u kojem se zaposlenik nalazi u radnom odnosu.

**Član 20.**  
**(Naknada za plaćeni dopust i godišnji odmor)**

Zaposlenik za vrijeme plaćenog dopusta i godišnjeg odmora, ima pravo na naknadu plaće u visini svoje neto plaće iz prethodnog mjeseca, u skladu sa kolektivnim ugovorom i pravilnikom o plaćama i naknadama.

**Član 21.**  
**(Naknada za porodijski dopust)**

Zaposlenik za vrijeme porodijskog dopusta ima pravo na naknadu plaće prema propisima kantona kojim se uređuje ova oblast, prema mjestu uplate doprinosa, s tim da se razliku do visine pune plaće uplaćuje Grad Goražde u kojem se uposlenik nalazi u radnom odnosu.

**Član 22.**  
**(Naknada za službeno putovanje)**

- (1) Zaposlenik ima pravo na naknadu troškova službenog putovanja na području Federacije Bosne i Hercegovine, odnosno Bosne i Hercegovine, kao i za putovanje u inostranstvo, na koje se upućuju na izvršenje službenog zadatka.

- (2) Visinu i način ostvarivanja naknade iz stava (1) ovog člana utvrđuje pravilnikom o plaćama i naknadama Gradonačelnik, u skladu sa kolektivnim ugovorom.

### **Član 23.**

#### **(Naknada za prijevoz na posao i sa posla)**

- (1) Zaposleniku kome nije organizovan službeni prijevoz na posao i s posla, a čije je mjesto stalnog stanovanja od mjesta rada udaljeno najmanje (2) dva kilometra, pripada naknada za troškove prevoza u visini mjesečne karte gradskog, prigradskog, odnosno međugradskog saobraćaja.
- (2) U međugradski saobraćaj u smislu stava (1) ovog člana spadaju mjesta koja su udaljena od mjesta rada najviše 70 kilometara.

### **Član 24.**

#### **(Naknada za slučaj povrede na radu, teške bolesti i invalidnosti)**

- (1) U slučaju povrede na radu, teške bolesti ili invalidnosti zaposlenika ili člana njegove uže porodice, isplaćuje se u godini kada je nastala povreda ili teška bolest odnosno kada je uspostavljena dijagnoza za to oboljenje, jednokratna novčana pomoć u visini od dvije prosječne neto plaće isplaćene u Federaciji Bosne i Hercegovine prema zadnjem objavljenom statističkom podatku.
- (2) Naknada iz stava (1) ovog člana isplaćuje se samo jednom po osnovu iste povrede, iste teške bolesti ili istog invaliditeta.
- (3) Članom uže porodice u smislu stava (1) ovog člana smatraju se članovi uže porodice zaposlenika kako je regulisano u stavu (2) člana 31. ove Odluke.
- (4) Zaposleniku se može u skladu sa raspoloživim sredstvima isplatiti dio ili ukupni troškovi liječenja teške invalidnosti ili teške bolesti u zdravstvenoj ustanovi u kojoj je on platio troškove tog liječenja. Troškovi liječenja isplaćuju se na osnovu fakture ili računa zdravstvenih ustanova u kojima je liječenje obavljeno.
- (5) Pod teškom bolešću iz stavova (1) i (4) ovog člana, podrazumijevaju se slijedeće bolesti: akutna tuberkuloza, maligna oboljenja, endemska nefropatija, hirurška intervencija na srcu i mozgu, sve vrste degenerativnih oboljenja centralnog nervnog sistema, infarkt (srčani i moždani), oboljenje mišićnog sistema, paraliza i druge teške bolesti određene opštim aktom Federalnog ministarstva zdravstva, kao i teške tjelesne povrede. Bolest, odnosno teška povreda dokazuje se na osnovu dijagnoze odnosno potvrde izdate od nadležne zdravstvene ustanove, u kojoj mora biti izričito navedeno kada je bolest nastala.

- (6) Pravo na jednokratnu novčanu pomoć iz stava (1) ovog člana, po osnovu teške invalidnosti ostvaruje se za utvrđeni stepen invalidnosti od najmanje 60%.
- (7) Ova naknada odobrava se rješenjem koje donosi Gradonačelnik.
- (8) Ukoliko u gradskom organu rade dva ili više članova porodice, odnosno ostvaruju pravo na plaću i naknade iz Budžeta Grada Goražde, pravo na jednokratnu novčanu pomoć iz stava (1) ovog člana ostvaruje jedan član uže porodice.

#### **Član 25.**

##### **(Naknada za slučaj smrti i pravo na osiguranje od posljedica nesretnog slučaja)**

- (1) U slučaju smrti zaposlenika, njegovoj porodici se isplaćuju troškovi sahrane u visini od tri prosječne neto plaće isplaćene u Federaciji Bosne i Hercegovine prema zadnjem objavljenom statističkom podatku.
- (2) Članom uže porodice uposlenika, u smislu stava (1) ovog člana smatraju se bračni i vanbračni drug ako žive u zajedničkom domaćinstvu, dijete (bračno, vanbračno, usvojeno, pastorče i dijete bez roditelja uzeto na izdržavanje do 18 godina odnosno do 26 godina starosti, ako se nalaze na redovnom školovanju i nisu u radnom odnosu, a djeca nesposobna za rad bez obzira na starosnu dob), roditelji (otac, majka, očuh, maćeha i usvojitelji), braća i sestre bez roditelja do 18 godina odnosno do 26 godina starosti ako se nalaze na redovnom školovanju i nemaju drugih prihoda već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad bez obzira na starosnu dob, pod uvjetom da s njima živi u zajedničkom domaćinstvu i unučad ako nemaju roditelja i žive u zajedničkom domaćinstvu s uposlenikom.
- (3) Naknada iz stave (1) ovog člana isplaćuje se i u slučaju smrti člana uže porodice zaposlenika.
- (4) Ukoliko u gradskom organu rade dva ili više članova porodice, troškovi sahrane iz stava (1) ovog člana se isplaćuju samo jednom zaposlenom članu porodice.
- (5) Zaposlenik ima pravo na osiguranje od posljedica nesretnog slučaja sa uključenim rizikom od prirodne smrti za vrijeme trajanja radnog odnosa u gradskom organu.
- (6) Visina osiguranja po osnovi iz stava (5) ovog člana određuje se prema polici osiguranja od posljedica nesretnog slučaja odnosno polici osiguranja od prirodne smrti.
- (7) Ugovor o osiguranju sa odgovarajućom osiguravajućom kućom zaključuje Gradonačelnik za sve zaposlenike u gradskom organu.

#### **Član 26.**

##### **(Otpremnina)**

Zaposlenik ima pravo na otpremninu prilikom odlaska u penziju u visini svojih pet ostvarenih prosječnih neto plaća isplaćenih u prethodnih pet mjeseci.

**Član 27.**  
**(Naknada plaće u slučaju prekobrojnosti)**

- (1) U slučaju prestanka radnog odnosa državnog službenika odnosno namještenika zbog prekobrojnosti, taj državni službenik odnosno namještenik ima pravo na naknadu, i to:
- a) Za radni staž do 10 godina, naknadu u visini od tri neto plaće koje je ostvario u prethodnom mjesecu,
  - b) Za radni staž od 11 do 30 godina, naknadu u visini od šest neto plaća koje je ostvario u prethodnom mjesecu i
  - c) Za radni staž preko 30 godina, naknadu u visini od deset neto plaća koje je ostvario u prethodnom mjesecu.
- (2) Pravo na naknadu iz stava (1) ovog člana ne odnosi se na izabrana i imenovana lica.

**Član 28.**  
**(Naknada za rad u komisijama)**

- (1) Članovi komisija, koje se formiraju na osnovu rješenja Gradonačelnika odnosno Pomoćnika Gradonačelnika po ovlaštenju Gradonačelnika, a čije je formiranje predviđeno zakonom, imaju pravo na naknadu za rad u komisijama.
- (2) Tačan iznos odnosno visinu naknade za rad u komisiji svojim aktom utvrđuje Gradonačelnik za svaku pojedinačnu komisiju, izuzev komisija koje se finansiraju od uplata fizičkih ili pravnih osoba.

**Član 29.**  
**(Visina plaće za pripravnike)**

- (1) Plaća pripravnika visoke, više i srednje stručne spreme zaposlenog u gradskim službama i gradskom Pravobranilaštvu utvrđuje se u iznosu, i to:
1. za visoku školsku spremu u iznosu od 80% od početne osnovne plaće utvrđene za radno mjesto stručnog saradnika;
  2. za višu školsku spremu u iznosu od 80% od početne osnovne plaće utvrđene za radno mjesto samostalnog referenta;
  3. za srednju stručnu spremu u iznosu od 80% od početne osnovne plaće utvrđene za radno mjesto referenta.
- (2) Početna osnovna plaća iz stava 1. ovog člana predstavlja samo iznos plaće bez dijela plaće po osnovu penzijskog staža.

### **Član 30.**

#### **(Visina naknade za lica na stručnom osposobljavanju bez zasnivanja radnog odnosa)**

- (1) Lica na stručnom osposobljavanju bez zasnivanja radnog odnosa visoke, više i srednje stručne spreme u gradskim službama i gradskom Pravobranilaštvu imaju pravo na naknadu, i to:
1. za visoku školsku spremu u iznosu od 35% od osnovne plaće utvrđene za radno mjesto stručnog saradnika;
  2. za višu školsku spremu u iznosu od 35% od početne osnovne plaće utvrđene za radno mjesto samostalnog referenta;
  3. za srednju stručnu spremu u iznosu od 35% od početne osnovne plaće utvrđene za radno mjesto referenta.
- (2) Visina naknade iz stava 1. ovog člana određuje se od osnovne plate odgovarajuće školske spreme.

## **V POSTUPAK ZA OSTVARIVANJE PRAVA**

### **Član 31.**

Uvećanja osnovne plaće iz člana 14. i 15. ove Odluke i naknade plaće iz člana 18, 20. i 23-27. ove Odluke, ostvaruju se donošenjem rješenja Gradonačelnika.

## **VI – PRELAZNE I ZAVRŠNE ODREDBE**

### **Član 32.**

Gradonačelnik je obavezan pravilnik o platama i naknadama zaposlenika gradskih organa Grada Goražda donijeti najkasnije u roku od 30 dana od dana donošenja ove Odluke.

### **Član 33.**

Na pitanja koja nisu regulisana ovom Odlukom shodno se primjenjuju odredbe Zakona o radu, Zakona o plaćama i naknadama u organima vlasti Federacije Bosne i Hercegovine, Zakona o pravobranilaštvu i Zakona o izboru, prestanku mandata, opozivu i zamjeni načelnika općina u Federaciji BiH, te ostali propisi koji regulišu ovu oblast.

### **Član 34.**

Postupci za ostvarivanje prava koji su započeti do stupanja na snagu ove Odluke okončat će se primjenom odredbama propisa iz člana 35. ove Odluke.

### **Član 35.**

Stupanjem na snagu ove Odluke, prestaje da važi Odluka o utvrđivanju koeficijenata za plaće funkcionera Općine Goražde (“Službene novine BPK Goražde broj 14/06), Odluka o utvrđivanju platnih razreda i koeficijenata državnih službenika i namještenika Općine Goražde (“Službene novine BPK Goražde broj 14/06).

### **Član 36.**

Ova Odluka stupa na snagu osmog dana od dana objavljivanja u “Službenim novinama Grada Goražda”.

Broj \_\_\_\_\_  
Datum: \_\_\_\_\_

**PREDSJEDAVAJUĆI**

Bajro Obuća

# OBRAZLOŽENJE

## I PRAVNI OSNOV

Pravni osnov za donošenje Oduke o utvrđivanju platnih razreda i koeficijenata za plaće, dodataka na plaće i naknada plaće izabраних dužnosnika, nosilaca izvršnih funkcija i savjetnika, državnih službenika i namještenika Grada Goražda plaćama uposlenika gradskih organa Grada Goražda, sadržan je u odredbama člana 17. i 88. Statuta Grada Goražda ("Službene novine Grada Goražda" broj: 05/18) i članova 60. i 63. Zakona o plaćama i naknadama u organima vlasti Federacije Bosne i Hercegovine ("Službene novine Federacije BiH" broj 45/10 i 111/12 i 20/17).

## II RAZLOZI DONOŠENJA

Članom 60. Zakona o plaćama i naknadama u organima vlasti Federacije Bosne i Hercegovine ("Službene novine Federacije BiH" broj: 45/10 i 111/12 i 20/17) propisano je slijedeće: "Koeficijenti i platni razredi zaposlenih u organima vlasti kantona, općine i grada se utvrđuju zakonom o plaćama i naknadama zaposlenih u organima vlasti kantona, odnosno odlukama gradskih i općinskih vijeća o platama i naknadama zaposlenih u općinskim odnosno gradskim organima vlasti. Zakonom o plaćama i naknadama zaposlenih u organima vlasti kantona, odnosno odlukama gradskih i općinskih vijeća o plaćama i naknadama u općinskim odnosno gradskim organima vlasti, propisat će se koeficijenti za izabrane dužnosnike, nosioce izvršnih funkcija i savjetnike u kantonalmim, gradskim i općinskim organima vlasti, s tim da se ne mogu utvrditi veći koeficijenti od koeficijenata utvrđenih u članu 9. ovog Zakona. Prilikom utvrđivanja koeficijenata kantoni, općine i gradovi će propisati iste koeficijente za ista radna mjesta u okviru istih platnih razreda za državne službenike i namještenike u skladu sa odredbama člana 20. i 21. ovog zakona"

Također, članom 63. Zakona o plaćama i naknadama u organima vlasti Federacije Bosne i Hercegovine ("Službene novine Federacije BiH" broj 45/10 i 111/12 i 20/17) propisano je slijedeće: "kantoni, općine i gradovi u Federaciji dužni su donijeti svoje usaglašene propise iz oblasti plaća i naknada sa ovim zakonom u roku od 90 dana od dana primjene ovog Zakona".

Plate i naknade plata u gradskim organima vlasti uredene su Odlukom o utvrđivanju koeficijenata za plaće funkcionera Općine Goražde ("Službene novine BPK Goražde" broj 14/06), Odlukom o utvrđivanjem platnih razreda i koeficijenata državnih službenika i namještenika Općine Goražde ("Službene novine BPK Goražde" broj 14/06) i Pravilnikom o plaćama i drugim naknadama državnih službenika i namještenika u Službama gradske uprave Goražda ("Službene novine Grada Goražde" broj 6/20). Obzirom da koeficijenti u navedenim

općinskim/gradskim propisima kojim je uređen obračun i isplata plata u gradskim organima vlasti Grada Goražda, nisu usklađeni sa koeficijentima propisanim Zakonom o plaćama i naknadama u organima vlasti Federacije Bosne i Hercegovine, upitna je zakonitost primjene postojećih Odluka i Pravilnika, te je neophodno donijeti novu odluku kojom će se urediti pitanje plata i naknada, te stvorili zakonski preduslovi za isplatu istih.

**Rješenjem Knatonalnog upravnog inspektora, Broj UP-1-05-04-146/21 od 18.11.2021. godine, naloženo je Gradonačelniku Grada Goražda da preduzme radnje za uklađivanje Odluke o utvrđivanju platnih razreda i koeficijenata državnih službenika i namještenika Općine Goražde (“Službene novine BPK Goražde” broj 14/06) sa Zakonom o plaćama i naknadama u organima vlasti Federacije Bosne i Hercegovine (“Službene novine Federacije BiH” broj 45/10 i 111/12 i 20/17). Također, istim Rješenjem naloženo je usklađivanje Pravilnika o plaćama i drugim naknadama državnih službenika i namještenika u Službama gradske uprave Goražda (“Službene novine Grada Goražde” broj 6/20) sa navedenim Zakonom. Navedena usklađivanja bilo je potrebno uraditi u roku od 60 dana od dana izvršnosti Rješenja.**

Sve navedeno ukazuje na neophodnost da se Odluka o plaćama uposlenika gradskih organa Grada Goražde donese u što kraćem roku.

### **III OBRAZLOŽENJE ODLUKE PO POGLAVLJIMA**

#### **POGLAVLJE I-OPĆE ODREDBE**

Ovo poglavlje sadrži predmet odluke, načela za utvrđivanje visine plaće, budžetsko osiguravanje sredstava za plaće i naknade, način utvrđivanja osnovice za obračun plaće i elementi za utvrđivanje osnovne plaće.

#### **POGLAVLJE II-PLAĆE IZABRANIH I IMENOVANIH LICA**

Ovo poglavlje sadrži odredbe koje se odnose na izabrane i imenovane dužnosnike i to: ostvarivanje plaće prema radnom mjestu, vrijeme ostvarivanja prava na plaću izabranih i imenovanih dužnosnika, platni razredi i koeficijenti za izabrane i imenovane dužnosnike i način obračuna i isplate plaće za izabrane i imenovane dužnosnike. U skladu sa članom 60. stav 2. Zakona o plaćama i naknadama u organima vlasti Federacije Bosne i Hercegovine, utvrđeni su manji koeficijenti za izabrane i imenovane dužnosnike u odnosu na koeficijente propisane Zakonom. Naime, navedenim članom je propisano da se ne mogu utvrditi veći koeficijenti od koeficijenata utvrđenih u članu 9. Zakona o plaćama i naknadama u organima vlasti Federacije



Bosne i Hercegovine, što znači da se za pomenuta lica mogu utvrditi i niži koeficijenti od koeficijenata predviđenih federalnim Zakonom.

### POGLAVLJE III-PLAĆE DRŽAVNIH SLUŽBENIKA I NAMJEŠTENIKA

U ovom poglavlju navedene su odredbe koje se odnose na određivanje plaće prema radnom mjestu, platni razredi i koeficijenti za državne službenike, platni razredi i koeficijenti za namještenike i način obračuna i isplate plaće. U odredbama koje se odnose na platne razrede i koeficijente za državne službenike i namještenike u potpunosti ispoštovan član 60. stav 3. Zakona o plaćama i naknadama u organima vlasti Federacije Bosne i Hercegovine a u vezi sa članovima 20. i 21. Zakona.

### POGLAVLJE IV-UVEĆANJE OSNOVNE PLAĆE

Ovim poglavljem regulisana su uvećanja osnovne plaće u slučaju prekovremenog rada, rada u neradne dane (subotom i nedjeljom), noćnog rada i rada u dane državnih praznika. Također navedene su odredbe koje se odnose na uvećanje osnovne plaće za inspektora i glavnog inspektora, zatim za starješine profesionalne vatrogasne jedinice, zamjenik starješine profesionalne vatrogasne jedinice, i ostale u profesionalnoj vatrogasnoj jedinici Grada Goražde zbog posebnih uslova rada, težine i prirode posla i odgovornosti za obavljanje poslova vatrogastva iz Člana 68. Zakona o zaštiti od požara i vatrogastvu, kao i uvećanje osnovne plaće za ostale poslove koji se vrše pod posebnim uslovima rada određenim posebnim zakonom.

### POGLAVLJE V-NAKNADE PLAĆE

U ovom poglavljem nevedene su odredbe koje se odnose na naknade plate i to: naknada za ishranu u toku rada (topli obrok), naknada na ime regresa za korištenje godišnjeg odmora, naknada za bolovanje, naknada za plaćeni dopust i godišnji odmor, naknada za porodiljski dopust, naknada za službeno putovanje, naknada za prijevoz na posao i sa posla, naknada za slučaj povrede na radu, teške bolesti i invalidnosti, naknada za slučaj smrti i pravo na osiguranje od posljedica nesretnog slučaja, otpremnina prilikom odlaska u penziju, naknada plaće u slučaju prekobrojnosti i naknada za rad u komisijama. Odlukom je propisana visina plaće za pripravnike i visina naknade za lica na stručnom osposobljavanju bez zasnivanja radnog odnosa. Također, Odlukom je propisano da će se pojedine odredbe koje se odnose na naknade, detaljnije regulisati pravilnikom o plaćama i naknadama, koji će donijeti Gradonačelnik Grada Goražda u skladu sa kolektivnim ugovorom za službenike organa uprave i sudske vlasti u Federaciji BiH.

## POGLAVLJE VI-POSTUPAK OSTVARIVANJA PRAVA

Ovim poglavljem je predviđeno da se uvećanja osnovne plaće iz člana 14. i 15. ove Odluke i naknade plaće iz člana 18, 20. i 23-27. ove Odluke, ostvaruju se donošenjem rješenja Gradonačelnika po službenoj dužnosti.

## POGLAVLJE VII-PRELAZNE ODREDBE

Predviđeno je da postupci za ostvarivanje prava koji su započeti do stupanja na snagu ove Odluke okončat će se primjenom odredaba propisa iz člana 35. ove Odluke. Ovim poglavljem je definisano stupanje na snagu Odluke. Bitno je napomenuti da je preduslov za primjenu ove Odluke utvrđivanje nove osnovice za obračun plate.

## IV OČEKIVANI EFEKTI

Donošenjem ove Odluke izvršit će se zakonska obaveza usaglašavanja propisa iz oblasti plaća i naknada Grada Goražda sa Zakonom o plaćama i naknadama u organima vlasti Federacije Bosne i Hercegovine i stvorit će se preduslovi za zakonit obračun i isplatu plaća zaposlenih u gradskom organu Grada Goražda. Također, donošenjem ove Odluke izvršit će se Rješenje Upravnog inspektora BPK Goražde kojim je naloženo usklađivanje Odluke o utvrđivanju koeficijenata državnih službenika i namještenika sa Zakonom o plaćama i naknadama u organima vlasti u FBiH, te usklađivanje Pravilnika o plaćama i drugim naknadama državnih službenika i namještenika u službama Gradske uprave Goražda sa Zakonom o plaćama i naknadama u organima vlasti u FBiH. U zavisnosti od osnovice za obračun plaće koja se postigne u pregovorima Gradonačelnika i sindikata i koju potvrdi Gradsko vijeće Grada Goražda, doći će do usklađivanja rasta plata sa indeksom rasta potrošačkih cijena. Obzirom da su plate uposlenih u gradskom organu Grada Goražda javne, ova Odluka predstavlja i bitnu antikoruptivnu mjeru.

## IV POTREBNA FINANSIJSKA SREDSTVA ZA PROVOĐENJE ODLUKE

Obzirom da će u narednom periodu gradonačelnik u pregovorima sa sindikatom dogovoriti osnovicu za 2022.godinu, a konačnu odluku donijeti Gradsko vijeće, tačan iznos novčanih sredstava za realizaciju ove odluke biće poznat u postupku donošenja prethodne odluke odnosno odluke o izvršavanju Budžeta Grada Goražda za 2022. godinu.

GRADONAČELNIK

ERNEST IMAMOVIĆ

